

覺

非

盦

筆

記

覺非盦筆記卷五

顧堃思

吳氏澂云東西周有二一以前後建都之殊而名一以二公封邑之殊而名考武王西都鎬京而東定鼎於郊郢周公相成王宅洛邑營澗水東瀍水西以朝諸侯謂之王城又謂之東都實郊郢於今爲河南又營瀍水東以處殷頑民謂之成周又謂之下都於今爲洛陽自武成康昭穆共懿孝夷厲宣幽十二王都鎬京爲西周迨平王東遷傳桓莊釐惠襄頃匡定簡

靈景共十二王都王城爲東周至景王之庶長子朝與王猛爭國猛東居於皇晉師納之入於王城次月猛終旬及踰半期而子朝又入王辟之東居於狄泉子朝據王城曰西王敬王在狄泉曰東王越四年子朝奔楚敬王雖得返國然子朝餘黨多在王城乃徙都成周而王城之都廢至考王封其弟揭於王城以續周公之官職是爲周桓公桓公生威公威公生惠公惠公之少子班又別封於鞶以奉王是爲東周惠公父子同謚以鞶與成周皆在王城之東故班之兄

則仍襲父爵居於王臣是爲西周武公以王城在成周之西故自此以後西有公東亦有公二公各有所食而周尙爲一也顯王二年趙韓分周地爲二二周公治之王寄焉而已東周惠公卒子傑嗣慎靓以上皆在東周赧王立始遷於西周卽王城也其後西周武公卒子文君嗣赧王五十九年秦滅西周西周公入秦獻其邑而歸是年赧王崩次年周民東亡秦遷西周公于懸狐聚又六年秦滅東周遷東周公于陽人聚前後建都之殊者以鎬京爲西周對王城爲東

周言也二公封邑之殊者以王城爲西周對成周爲東周言也總之周三十七王前十二王都鎬京爲西周中十三王都王城爲東周季世自敬王厯元貞哀思考威烈安烈顯慎靚十一王都成周赧一王都王城夫一王城也昔以東周稱後以西周稱蓋周末東西之分因武惠二公各居一都而名係乎公不係乎王也邵子經世書紀赧王爲西周君與東周惠公並而西周公無聞焉則直以西爲王東爲公矣知東之有公而不知西亦有公也知王之在西而不知赧以

前之王固在東也戰國策編題者先東周次西周豈無義哉二周分治以來顯與慎靚二代五十餘年王于東赧五十餘年王于西先東後西順序也

宋葉氏大慶著考古質疑云前書歷志曰孝成世劉向總六歷列是非作五紀論向子歆究其微眇作三統歷及譜以說春秋推法密要故述焉是則三統歷乃歆作也司馬彪作後漢志迺曰自太初年始用三統歷施行百有餘年按太初乃武帝年號歆生前漢之末安得太初元年始用三統歷又按哀帝建平二

年改爲太初元壽元年若指爲此太初則是時固有三統曆矣但自此至建武八年朱浮許淑等上書言曆不正之時止三十六年不應言施行百有餘年也何承天亦議之堃據大昕錢氏云太初造術以前四千六百一十七歲爲上元一元之中卽有三統三統與太初異名而同實劉子駿以太初法推衍之以說尚書春秋又追日月五星同起牽牛之始以爲太極上元初非別立一術則三統之名固不自歛始也

張禹西漢有兩人東漢又有二人一河內軼人帝師

爲丞相卽朱雲所謂欲斬佞臣頭一人者一清河人  
傳詩此西漢也一則東漢永初時爲太尉者○有兩  
公孫弘一西漢對策第一人爲丞相一則東漢人爲  
幽州從事虞延欲辟之以其交通楚王而止者也○  
有兩韓嬰一在西漢燕人卽世所傳韓詩者是一在  
東漢南陽人其父歆爲大司徒光武以其言剛切免  
官復詔切責之歆乃與其子嬰自殺○有兩張敞一  
西漢京兆尹一東漢時南陽人爲竇武令史武自殺  
與掾胡騰共匿其孫輔於零陵界○有兩胡廣一東

漢人字伯始京師諺曰天下中庸有胡公一晉人字宣祖位至少府胡奮兄也○有兩徐邈一魏人字景山爲尙書郎好飲趙達白事邈適醉但曰中聖人一晉人爲祠部郎常詣東府遇衆賓沈濶邈曰陋巷晝生惟以節儉清修爲暢耳此皆偶然拈出者其餘不可枚舉或前人已經臚陳或覩記有所未備故述止于此

褒謫閒評載徽宗初踐祚詔以建中靖國改元是時羣臣或有言建中乃唐德宗時年號徽宗竟不之從

此已兆播遷之禍矣凡改元紀號最忌與前世謚號  
陵名相犯宋熙甯崇甯二號乃南朝章宣二后陵名  
也

以上皆評語

余因攷明代永樂之號据南唐世家

見五代史

虔州妖賊張遇賢自號中天八國王改元永樂置官  
屬踞白雲洞有衆十餘萬連陷諸縣景遣洪州營屯  
虞侯嚴思通事舍人邊鎬攻之羣盜執遇賢以降其  
紀載彰彰如此乃成祖以之紀年豈非當時文臣不  
學之故歟

明皇問張說曰今之姓氏皆云出自帝王後古者無

民耶說對曰古者民無姓有姓者皆有土有爵者也故左傳曰天子命德因生以賜姓胙之土而命之氏黃帝之子二十五人得姓者十四而已其後居諸侯之國土者其民以諸侯之姓爲姓居大夫之采地者以大夫之姓爲姓莫可分也按說之言誠不易之論十二姓者姬酉祁己牒歲任荀僖信環依是也青陽與夷鼓皆已姓此錫姓之始

棄疾君父之際可謂窮矣或謂君子不幸處此洩命而逃其父身死司敗可也愚謂不然父有罪而受討

是天討也天其可逃乎逃之是無君父之分也且子  
南之爲臣旣聞君命安保其不爲篡弑之事是益之  
罪也舜之可以竊負而逃緣瞽瞍所犯者小若伯鯀  
之罪則禹不得竊逃矣天子之父尙不得而壞法況  
臣乎故棄疾之事君子無譏焉

臣于子糾亦可臣于桓公臣于建成亦可臣于太宗  
子糾建成非君也晏子所謂非其私暱誰敢任之是  
也君子處此務以正道至情匡救彌縫使之油然于  
骨月天性之情而隱晦其隙上也安有預圖其事而

教人以大惡者乎如必不見聽則奉身以退我勿預  
知可也非苟免也後有求者亦以此道告之而已非  
倖祿也使謂管仲王珪事讎則王吉龔勝亦有事讎  
之嫌矣若子糾旣爲君而桓公篡之仲不可立于朝  
也明之惠帝殉國舉朝死之是也若仲珪之事以孔  
子斷之足矣後儒之論俱不必辨以上二條  
馮偉說

宣聖及七十二子像贊高宗御製并書其像則李公  
麐所畫也史記載孔子之言曰受業身通者七十七  
人其姓名具於列傳家語所載亦七十七人無公伯

僚秦冉鄭單而有琴牢陳亢縣亶惟文翁禮殿圖作  
七十二人而圖亦罕傳林放蘧瑗二人史記家語不  
載禮殿圖有之其他不可知矣攷舊唐書禮儀志載  
開元二十七年制贈公者一人侯者九人伯六十七  
人與史記七十七人之數合然杜氏通典載諸賢封  
號則贈伯者實七十二人蓋十哲之外別有七十二  
賢兼史記家語禮殿圖所互見者而數之也宋祥符  
二年追封閔子以下九人爲公曾子而下六十二人  
爲侯并堯國公爲七十二弟子大觀二年追封公夏

守十人侯爵預祀典則仍加七十二賢于十哲外矣  
思陵撰七十二子贊校之祥符所追封多廉潔秦商  
后處樂欵少公良孺勾井疆顏何公西輿如不知又  
何所據

文獻通考云通典所載除十哲外計七十三人係增  
入邊瑗林放陳亢申張琴牢琴張六人按琴牢琴張  
本一人通典于琴牢云贈蘭陵伯于琴張但云贈伯  
而無地名蓋重出也

玉海稱聖賢十三贊理宗紹定三年御製淳祐改元

孟春謁先聖就賜國學宣示諸生蓋宓羲堯舜禹湯文武周孔顏曾思孟也

家語孔子年十九娶於宋亓官氏之女今攷韓敕禮器碑本作并官氏宋祥符追封及元至順加封詔皆作并官文字明白可證家語傳寫之訛廣韻引魯先賢傳孔子妻并官氏今本亦誤爲亓蓋流俗相傳失其本真惟石刻出于載以前者信而有徵也

元至正十二年五月所立關王廟碑稱王薨於章鄉今當陽縣玉泉山也今號大王塚每歲清明鄉人相

率上冢如祭埽之禮宋荆門守臣王銖始建祭亭環  
垣樹松柏紹聖三年五月賜廟額曰顯烈東廟曰昭  
貺卽侯子平也俗呼爲三郎荆楚之人相傳顯烈六  
月廿二日生昭貺五月十三生是日朝拜祭埽者遠  
近輻輳焉按王之生日不見於傳記碑所據者荆楚  
相傳之說今祀典遂以五月十三日爲王生辰矣

以上以

錢氏大  
昕說

古今量之大小與錢之輕重各隨時消長有不可一  
概論者攷班書食貨志稱李悝爲魏文作盡地力之

教云今一夫挾五口治田百畝歲收畝一石半爲粟  
百五十石除十一之稅十五石餘百三十五石食人  
月一石半五人終歲九十石餘有四十五石石三十  
爲錢千三百五十除社閭嘗新春秋之祀用錢三百  
餘千五十衣人率用錢三百五十終歲用錢千五百  
不足四百五十不幸疾病死喪之費及上賦斂又未  
與此此農夫所以常困有不勸耕之心而令糴至于  
甚貴者也

秦末諸侯並起民失作業而大饑鍤米石五千人相

食

宣帝卽位用吏多選賢良百姓安土歲數豐穰穀至石五錢農人少利

元帝卽位天下大水關東郡十一尤甚二年齊地饑穀石三百餘民多餓死

莽末年雒陽以東米石二千

漢興以爲秦錢重難用更令民鑄莢錢黃金一斤而不軌逐利之民畜積贏餘以稽市物痛騰躍米至石萬錢

孝文鑄四銖錢文爲半兩

武帝時有司言曰古者皮幣請侯以聘享金有三等  
黃金爲上白金次之赤金爲下乃以白鹿皮方尺緣  
以繪爲皮幣直四十萬王侯宗室朝覲聘享必以皮  
幣薦璧然後得行又造銀錫白金以爲天用莫如龍  
地用莫如馬人用莫如龜故白金三品其一重八兩  
圓之其文龍名白撰直三千二以重差小方之其文  
馬直五百三復小橢之其文龜直三百令縣官銷半  
兩錢更鑄三銖錢重如其文其後有司言三銖錢輕

易作姦乃更請郡國鑄五銖錢周郭其質令不得摩取鎔又令京師鑄官赤仄一當五官用非赤仄不行白金稍賤民弗寶用

王莽居攝更造大錢徑寸二分重十二銖文曰大錢五十又造契刀錯刀以黃金錯其文曰一力直五千與五銖錢凡四品並行莽卽真以劉字有金刀乃罷契刀錯刀及五銖錢而更作金銀龜貝錢布之品名曰寶貨小錢徑六分重一銖文曰小錢直一次七分三銖曰少錢十次八分五銖曰幼錢二十次九分

七銖曰中錢三十次一寸九銖曰壯錢四十因前大  
錢五十是爲錢貨六品直各如其文黃金重一斤直  
錢萬朱提銀八兩爲一流直一千五百八十它銀一  
流直干是爲銀貨二品其龜寶有四品貝貨五品又  
布貨十品布亦錢也大布次布弟布壯布中布差布厚布  
幼布幺布小布小布長寸五分重十五銖文曰小布  
一百自小布以上各相長一分相重一銖文各爲其  
布名直各加一百上至大布長二寸四重一兩而直  
千錢矣後五歲天鳳元年改作貨布長二寸五分廣

一寸首長八分有奇廣八分其圜好徑二分半足枚  
長八分間廣二分其文右曰貨左曰布重二十五銖  
直貨泉二十五貨泉徑一寸重五銖文右曰貨左曰  
泉枚直一

愚按米價低昂卽班書所載自石五錢而三十而三  
百餘而二千而五千而萬錢相懸若此之甚者何也  
雖歲有豐凶時有治亂要必由錢之輕重遞更量之  
小大不一貿易者乘除加減於其際史各據實書之  
耳

原錢之始太公爲周立九府圜法黃金方寸而重一  
斤錢圓函方輕重以銖布帛廣二尺二寸爲幅長四  
丈爲匹故貨寶於金利於刀流於泉布於布束於帛  
周景王鑄大錢名曰寶貨

秦幣二等黃金以溢爲名

溢二十兩也

上幣銅錢如周文

曰半兩重如其文

管子凡輕重斂散之以時則準平漢平準祖此

宋葉氏大慶著有攷古質疑內一條云吳氏漫錄言  
王觀國學林新編謂唐三百年皆鑄開元通寶無怪

乎此錢之多至五代有天祐天福唐國等錢而本朝專以年號然宋通元寶皇宋元寶非年號者宋通乃開寶時鑄皇宋乃寶元時鑄蓋錢文不可用二寶字故變之

皆王氏說余考後魏孝莊時用錢稍薄高道穆曰

論今據古宜改鑄大錢文載年號以紀其始然則以年號鑄錢久矣王說非也大慶謂王說之非固不止此吳氏所論要亦未然按梁武帝中大通元年魏多細錢高道穆上表宜改鑄大錢載年號以紀其始于是始鑄永安五銖永安乃魏孝莊年號以甲子攷之

時己酉歲又齊明帝建武二年魏人未嘗用錢魏主  
始鑄太和五銖太和乃元魏孝文年號是則文載年  
號已見于此時乙亥歲也又先平永安三十五年矣  
故高承事物紀原云錢文以年自魏孝文太和始蓋  
以此也大慶又按杜佑通典宋景和二年鑄二銖錢  
文曰景和景和二年前廢帝年號卽永光元年  
是年明帝卽位又改泰始乙巳歲也又宋  
孝武卽位鑄孝建四銖孝建元年甲午歲也又先太  
和四十二年矣然則以年號鑄于錢文當以南宋孝  
建景和爲始而北魏太和永安皆後于此者也故曰

吳氏所論要亦未然乃若學林謂唐三百年皆鑄開元無怪乎此錢之多非也按唐食貨志高宗乾封元年改鑄乾封泉寶肅宗乾元元年改鑄乾元重寶而代宗時又鑄大厯元寶謂三百年皆鑄開元誤矣又云五代有天福天祐等錢天祐乃唐末年號初非五代故曰王說之非不止如吳氏所云也開元所以獨多者蓋自乾封改鑄之後商賈不通米帛涌貴後行開元錢天下皆鑄之又武宗時許諸道皆得置錢坊李紳請天下以州名鑄錢京師爲京錢大小徑寸如

開元夫以高宗時天下皆鑄武宗時諸道置坊開元  
獨多此也吳氏又謂世所傳青瑣集乃以開元錢明  
皇所鑄上有甲痕楊妃指跡殊不知談賓錄武德中  
進開元錢樣文德皇后指一痕因鑄之然則青瑣云  
爾其謬可知孔氏雜記亦言開元通寶歐陽詢撰其  
文并書世俗不知遂以爲明皇所鑄太慶謂吳氏所  
引二書正欲證其非明皇時以辨青瑣之謬然唐紀  
明言高祖武德四年鑄開元通寶徑八分重二銖四  
參積十錢重一兩得輕重大小之中沈存中筆談云  
參乃累字之誤

爾十索爲一銖大慶據此一錢重二銖四累則積通  
十錢爲二十四銖乃與一兩之言合索力水切通鑑亦載于武德四年命給事中歐陽詢撰其文并書  
回環可讀吳氏豈偶忘此耶何必引談賓錄爲證也  
大慶又觀通鑑攷異薛當聖運圖云初進蠟樣文德  
皇后掐一甲故錢上有甲痕又凌蟠唐政要錄乃以  
爲竇皇后按是時竇后已亡文德未立今皆不取攷  
異之言如此則談賓錄亦未足爲據也惟取信于史  
則知其爲武德所鑄足矣區區甲痕不足辨也然自  
今而觀開元錢亦有無甲痕者有輕重大小不等者

有篆文者有錢背之字不同者蓋此錢非盡出于武德所鑄歐陽所書亦有高宗武宗所鑄者若錢背有京洛潤益者由李紳請以州名鑄故也竊怪近世刊行涉世錄乃謂開元皇帝時有人詐作神降帝問有何所求其人乃云欲得錢百萬帝乃特鑄開元錢與之以爲之別俟其出用則可捕矣其後將出罪人斯得所有爪甲乃錢樣將上貴妃以爪掐之帝命勿改故至今有甲痕也此其說尤爲誕妄或謂錢文多載年號明皇以開元紀年武德何爲先有此錢也曰自

我本朝專以年號紀於錢文爾攷其自始雖曰南朝之孝建景和北朝之太和永安然中間亦有不以年號者如齊文宣之常平五銖周宣帝之永通萬國是也唐高祖開元通寶亦此類耳然則明皇之年偶符武德之錢文而開元通寶非紀明皇之年號也五代相承石晉於天福年間則有二品曰天福鎮寶  
前蜀曰天福元寶王氏有天漢光天乾德咸康後蜀孟氏亦有廣政皆以年號外此如大唐唐國等錢其李主所鑄者歟此又不以年也惟我朝專以年號獨開寶寶元不然有

如學林所云者蓋出于歐陽歸田錄其言是矣或謂  
藝祖以建隆改乾德今有乾德錢安知其爲蜀錢乎  
蓋宋通錢體製厚廣輪郭分明以後皆然彼乾德形  
式細薄與天漢等錢相似以此知爲蜀錢也

此條全錄原文

齊人伐燕孟子明言宣王而史記則以爲湣王自蘇  
氏作古史陳氏著新話皆疑孟子爲誤至朱子亦無  
定論然戰國策有云燕王噲旣立蘇秦死于齊蘇秦  
之在燕也與其相子之爲婚而蘇代與子之交及秦  
死而齊宣復用代使於燕燕王問齊王何如曰必不

謂曰何也曰不信其臣代欲激燕王之厚任子之也  
于是燕王大信子之子之南面行王事三年燕國大  
亂儲子謂齊宣王因而仆之破燕必矣孟軻謂齊宣  
王曰今伐燕此文武之時不可失也王因令章子將  
五都之兵因北地之衆伐燕燕王噲死齊大勝子之  
亡由斯而校孟子初未嘗誤也然則以爲誤者皆因  
遷史世家年表而爲是言歟司馬公作通鑑乃于周  
顯王三十六年云齊威王薨子宣王立顯王四十八  
年云燕易王薨子噲立據此則齊宣正與燕噲同時

顯王在位四十八年次年  
覲王立又六年報王立

元年燕國大亂齊伐

燕且舉孟子答問之言甚悉是歲齊宣王薨子湣王

立然則齊宣十九年通鑑亦與年表同獨年表以宣  
王立于顯王二十七年通鑑則謂立于三十六年故

自是次第有差爾

此條亦本葉氏大慶說

孤竹君是殷湯三月丙寅日所封相傳至夷齊之父  
名初字子朝伯夷名元字公信叔齊名致字公達解  
者云夷齊諡也伯仲又其少長之字應劭云孤竹君  
姓墨胎氏見韓詩外傳及呂氏春秋

兄終弟及殷制也而流弊滋甚所以傳子爲義之正  
五代史南唐世家李景嗣昇立封弟景遂爲燕王景  
達爲鄂王景溫爲保甯王秋又改封景遂爲齊王諸  
道兵馬元帥太尉中書令景達爲燕王副元帥盟於  
昇極前約兄弟世世繼立此蓋先宋太祖而效殷法  
者皆不可訓也

五代有兩沒字碑唐安重誨薦崔協可爲相任圜爭  
曰天下皆知崔協不識文字而虛有儀表號爲沒字  
碑後卒爲相人多嗤其所爲安叔干狀貌堂堂而不

通文字時人亦謂之沒字碑歷唐晉漢並附契丹至周兵入京師掠其家貲傷重而死

漢制公卿以下皆五日一休沐唐會要永徽三年上以天下無虞百司務簡每至旬假許不視事以便百僚休沐則唐時十日一休沐休沐亦謂之休澣唐書劉晏傳質明視事至夜分止雖休澣不廢是也宋時百官旬假循唐故事有上澣中澣下澣周益公撰光堯本命道場滿散朱表有日踰中澣之旬攷其時乃十月二十一日又撰四月十八日丁亥本命道場

朱表亦云日近中休然則每月之十日爲上澣中澣則二十日下澣則晦日矣一旬中止一澣日今人以代上中下旬失其旨也又休澣惟有官人乃可用之不當通之士庶也

金大定戊申蓮峯真逸二絕句石刻有上沐字猶上澣也

宋初有兩王著一爲單州單父人字成象官翰林學士一爲京兆渭南人字知微官翰林侍書史皆有傳字知微者爲太宗摹勒閣帖者也字成象者傳云開

寶二年卒

吐蕃者南涼禿髮利鹿孤之後音轉爲吐蕃

唐書會要尙書左右僕射自武德至長安四年以前  
並是正宰相豆盧欽望拜左僕射不言同中書門下  
三品不敢參議省事數日始加知軍國重事至景雲  
二年韋安石除左僕射東都留守不帶同三品自後  
空除僕射不是宰相遂爲故事

宋制開封爲東京歸德爲南京河南爲西京大名爲  
北京

唐碑署銜有四品孫五品孫之稱按唐書選舉志三品已上蔭曾孫五品已上蔭孫孫降子一等碑列朱賓鄭莊二人法當蔭敘而尙未得官故以四品孫五品孫署銜也他碑蓋所未有錢竹汀云

龔明之中吳紀聞姑蘇自祥符間定制科舉以四人爲額慶歷中就舉者止二百人范貫之送錢正叔赴舉序已言四人之額視他藩爲最寘熙甯元豐間應舉者漸多增爲六人三舍既罷去科舉法歲貢四人舍法罷乃合三年之數爲十二人紹興丙子又增流

寓一名

宋嘉熙己亥徐清叟等在曾公巖題名有綉使黃自明綉乃繡之俗字繡使未知何官

廣志有子姓所述而題某人填諱者案顏氏家廟碑敘述先世皆直書其名而加諱字顧炎武博引張說陳子昂劉禹錫白居易李翱諸人文證之以爲古人臨文不諱今人所述先人行狀而使他人填諱非古人文法也予考周益公跋初寮王右丞贈曾祖詩末題通直郎田豫填諱則宋人已有之矣錢氏大昕云

范成大同年唱酬詩序載宋時進士登第既朝謝揆日集貢院奉賜第錄黃於香案列拜庭下禮畢更以齒班立四十以上東序西向未四十西序東向推年最長及最少者各一人升堂長者中立南嚮少者北鄉春官吏贊拜少者拜又贊答拜長者洎兩序皆再拜謂之拜黃甲敘同年

元世宗製笙名興隆又有斧名勞正以玉爲之自殷時流傳至元者朝會時一人執之立於陛下取正人不正之義宋訥有過故宮詩云興隆有管鸞笙歌勞

正無官玉斧沈

覺非盦筆記卷五 終

覺非盦筆記卷六

顧堃思亭集

馮氏偉云老子出生入死一段說者紛紛愚謂出生入死者言人自有生以後聲色嗜欲皆所以戕伐其性而入死之道也生之徒十有三死之徒亦十有三言可生可死之常道均在人自擇耳人之生動之死地者亦十有三言生死之道雖均而無如人之趨死者又居其三則之死者十之六矣生生之厚沈溺而不知有死也所謂死於安樂也

李純甫號屏山居士金尙書右司都事著鳴道集說其論學者云內有三疵外有四孽何謂三疵識鑿之而賊氣憑之而亢才蕩之而浮何謂四孽學封之而塞辨譁之而疑文甘之而狂名錮之而死深中學者膏肓之病

秦端毅竑云有不可知之天道無不可知之人事又云平日操持非實驗之當境決難自信可謂近裏切己之言又云凡應接之道待小人尤宜寬乃君子之有容不然反欲小人容君子哉皆吾輩所當書紳者

夏寅松江華亭人嘗語人曰君子有三可惜此生不學一可惜此日閒過二可惜此身一敗三可惜可稱名言

惠氏棟云太上感應篇卽抱樸子所述漢世道戒如三台北斗司命竈神之屬證諸經傳無不契合非後人所能假託然隋經籍唐藝文志皆無之宋藝文志始有李昌齡感應篇一卷此書之傳蓋自李始矣據仇山村跋則宋有李善齋注其後鄭相安晚湯侯北村徐公博雅輯而爲贊衍而爲解韻而爲詩今惟鄭

清之書載於道藏餘無聞焉

家金臯志沖云今世所傳禽經相沿爲師曠作張華注蓋僞託也按埤雅爾雅翼所引禽經今本皆不載姑就所見者錄于後

青鳳謂之鶠赤鳳謂之鵩黃鳳謂之鸞白鳳謂之鶴紫鳳謂之鷺○鶴愛陰而惡陽雁愛陽而惡陰○鶴老則聲下而不能高近而不能察○鷹雞多秋生雉雞多冬死○旋目其名鶠方目其名鳩交目其名鴟○鳥之小而鷺者皆曰隼大而鷺者皆曰鳩○烏鳴

啞啞鸞鳴嘛嘛鳳鳴喈喈凰鳴啾啾雉鳴鶩鶩雞鳴  
咿咿鶯鳴嚙嚙鵲鳴喈喈鴨鳴呷呷鵠鳴咷咷鵝鳴  
唄唄○其足鴛謂之蹠鼻謂之跗雞謂之跖鷹謂之  
駭鴛謂之胫鷗謂之韉○卻近翠者能步卻近蒲者  
能擲○朱鳶不攫肉朱鷺不吞腥○鷺好風鷗好雨  
鷄好霜鷺好露○陸鳥曰棲水鳥曰宿獨鳥曰止衆  
鳥曰集○鶴俯鳴則陰仰鳴則晴○鵝見異類差翅  
鳴雞見同類拊翅鳴○雔上無尋鷄上無常雉上有  
文鷄上有赤○古鳴卽小雨朝鳶鳴卽大風○鶴

鶠之信不如鷹周周之智不如鴻○濁河在岸則魚沒沸河在岸則魚詠○雕以周之鷺以就之鷹以膺之鶠以捐之隼以尹之○鵠雁愛力遇風迅舉孔雀愛毛遇雨高止○雁曰翁雞曰鶩鶡曰鷺○鷹不擊伏鶠不擊姪○鶠以怨望鶔以貪顧鶲以嗔睨鶩以怒瞋雀以猜瞿燕以狂瞵鶩以喜嚙鳥以悲啼鳶以飢鳴鶴以絜喙鳶以凶叫鶔以愁嘯鳴也○一鳥曰佳二鳥曰雔三鳥曰朋四鳥曰乘五鳥曰雇六鳥曰鶮七鳥曰鈜八鳥曰鸞九鳥曰鳩十鳥曰鶠○拙者

莫如鳩巧者莫如鶴○鵠見蛇則噪而竇孔其蛇則宛而躍○山禽之昧多短水禽之昧多長山禽之尾多修水禽之尾多促○衡爲雀虛爲燕火爲鶴亢爲鶴○鶴生三子一爲鶴鳩生三子一爲鶲○鷹好峙隼好翔鳬好沒鷗好浮○乾車斷尾則坐歌孔雀拍尾則立舞人勝之也鸞入夜而歌鳳入朝而舞天勝之也○霜傅僵枝鳥以武生者少雪封枯原鳥以文死者多○雀交不一雉交不再○冠鳥性勇帶鳥性仁纓鳥性樂○鵝飛則蜮沈鷗鳴則蛇結○鵝鳥不

登山鵠鳥不踏土

池北偶談載施愚山潤章書王考功西樵墓碑云君於諸書綜擇折衷獨有義例嘗病二十一史冗駁乖舛三國並列爲非謂宜廢陳氏而用謝陸季漢書倣晉書例列魏吳爲世家去宋齊梁陳北魏北齊周七書而用李延壽南北二史其未遑金用柯維祺宋史新編合之爲十二史旣正史體復省繁複擬上書不果又坊本子夏詩傳申公詩說并僞書李維正序行津逮秘書收之皆誤也爲辨甚詳有功經學甚大

彭氏輅云陳魯南應京兆白公聘修志顧東橋與之  
書云嚴惟中袁州府志都元敬黃山圖經李懋卿東  
莞志邵國賢許州志各自起意例須取參訂璘收有  
長安舊志惜不得到家檢奉子仁收天下志甚多想  
不乏此作志不難正惟發凡起例爲難耳又本府若  
上元之明道書院溧陽之水堰皆厚生正德大事須  
檢尋遺跡就請白公興復蓋百五六十年方遇明公  
一舉若又空言無施不獲實惠賢者難遇幸勿失此  
機會也又稅糧後當具供億一日查內府及諸司供

億近年與國初多寡之目庶仁者有憫惻之意此不爲徒作也

唐宋八大家之目世以爲歸安茅氏坤刲始非也臨海朱右伯賢氏定之於前矣彼云六家者合三蘇爲一耳至今鈔本大約皆本王道思唐應德所甄錄蓋順甫家饒於貰其所開雕皆藉手他氏也

劉子素繪答楊用修書云人情有所寄則有所忘寄而意不縱則忘之不遠惟忘之不遠而後我無所貪無所貪而後能適此言具有深意又論文云仙釋二

氏非聖之書吾旣不從其道卻借彼之言以資吾文  
所謂文者將何所爲乎爲文而雜以二氏此卽唐宋  
間雜學也昌黎不道二氏與二氏言必舉六經之言  
告之子厚爲某秀才文多引莊列頗奪正氣論亦凜  
凜至與二氏言便盛稱其教而雜諸戒律毘尼之說  
卻不自覺蘇氏記大悲勝相諸作至爲偈語準楞嚴  
法華大不宜也其持論甚正

曹植名都篇寒鼴炙熊燔七啟寒芳苓之巢龜資暇  
集引李氏注云今之腊肉謂之寒蓋韓國事饌尙此

法引鹽鐵論羊淹雞寒劉熙釋名韓羊韓雞爲證韓  
與寒同今本文選注無腊肉之解又細素雜記引李  
氏云涪月謂之寒今亦不載

周禮澤草所生種之芒種注者不知其解王氏農書  
云卽江南之架田也架田一名葑田以木棉架爲曲  
田繫浮水面以葑泥附木架上葑卽菰根也根最繁  
而善糾結以土泥著上刈去其蔓便可耕種江東淮  
南處處有之然王氏謂葑田卽周禮澤草芒種未有  
確據後讀郭璞江賦云播匪藝之芒種挺自然之嘉

蔬賦江而曰芒種嘉蔬又曰匪藝自然非葑田而何哉周禮之說因此可解見楊氏慎丹鉛續錄

王子年拾遺記西海之西有浮玉山山下有巨穴穴中有水其色若火晝則通曠不明夜則照耀穴外雖波濤灌盪其光不滅是爲陰火當堯世光爍起化爲赤雲丹輝炳暎百川恬徹游海者銘曰沉然以應火德之運也又丹鉛總錄易澤中有火素問澤有陽燄注陽燄如火烟騰起水面者蓋澤有陽燄乃山氣通澤山有陰靄乃澤氣通山文選海賦陰火潛然唐顧

况使新羅詩陰火暝潛燒是也抱朴子云南海中蕭邱有自生之火嘗以春起秋滅邱方千里當火起時此邱上純生一種木火起正著此木但小焦黑人或以爲薪者如常薪但不成炭炊熟則灌滅之後復更用如此無窮

都穆詩話木元虛海賦雲錦散文于沙汭初不解後遊東海之上見波紋印沙堅如刻畫毫髮不失而螺背珍異之物紛錯其間粲然五色日光射之真所謂雲錦散文也愛玩久之

西清詩話唐詩烈女傳王珪微時母盧氏嘗云子必  
貴但未知汝與遊者珪一日引房元齡杜如晦過之  
母曰汝貴無疑所載祇此而已質之少陵詩事未究  
也送重表姪王碌詩云我之曾老姑爾之高祖母爾  
祖未顯時歸爲尚書婦則珪母杜氏非盧氏也又云  
隨朝大業末房杜俱交友長者來在門荒年自餉口  
家貧無供給客位但箕帚俄頃羞頗珍寂寥人散後  
入怪鬢髮空吁嗟爲之久自陳翦髻鬟市充沽酒  
上云天下亂宜與英俊厚向竊窺數公經綸亦俱有

次問最少年虬髯十八九子等成大名皆因此人手下云風雲合龍虎一吟吼願展丈夫雄得辭兒女醜秦王時在坐真氣驚戶牖及乎貞觀初尚書踐台斗夫人常肩輿上殿稱萬壽六宮師柔順法則化妃后至尊均嫂叔盛事垂不朽其上下詳綺如此且一婦人識真主於側微尤偉甚史缺失而謬誤獨少陵載之號詩史信矣桐江詩話云觀少陵詩不特不姓盧乃王珪之妻非母也史氏之訛如此

藝苑雌黃云以子美之忠厚疑若無愧於論交其投

贈哥舒翰開府詩開府當朝傑論兵邁古風先鋒百  
勝在畧地兩隅空其美之至矣及潼關吏詩則曰哀  
哉桃林戰百萬化爲魚請囑防關將慎勿學哥舒何  
先後相戾若是哉概以純全之道亦未爲無疵也愚  
謂哥舒前後功過各不相掩據事直書正其所以爲  
詩史也

郭功甫嘗與荊公登金陵鳳凰臺追次太白韻援筆  
立成一座盡傾詩云高臺不見鳳凰遊浩浩長江入  
海流舞罷青蛾同去國戰殘白骨尚盈邱風搖落日

吹行棹潮擁新沙換故洲結綺臨春無處覓年年荒草向人愁

晏元獻守汝陰梅聖俞往見之將行公置酒潁河上因言古人章句中全用平聲製字穩貼如枯桑知天風是也恨未見仄字詩聖俞旣引舟遂作五仄體寄公云月出斷岸口影照別舸背且獨與婦飲頗勝俗客對月漸上我席暝色亦稍退豈必在秉燭此景已可愛

促句法止於兩體三句一換韻或平聲或仄聲皆可

江南秋色摧頰暑夜來一枕芭蕉雨家在江南白鷗  
浦一生未歸鬢如纖傷心日暮楓葉赤偶然得句應  
題壁此全仄也蘆花如雪灑扁舟正是滄江蘭杜秋  
忽然驚起散沙鷗平生生計如轉蓬一身長在百憂  
中鱸魚正美負秋風此全平也

溫庭筠嘗得句云蜜官金翼使花賊玉腰奴初得出  
句徧干知識無人可屬久之乃自聯其下余以爲道  
盡蜂蝶見清異錄

陸放翁嘗夢一故人語曰我爲蓮花博士鑑湖新置

官也我且去矣君能暫爲之乎月得酒于壺亦不惡也遂以詩紀之云白首歸修汗簡書每因囊粟歎侏儒不知月給于壺酒得似蓮花博士無又夢到萬頃荷花中有詩云天風無際路茫茫老作花王風露郎只把千鈞爲月俸爲嫌銅臭雜花香

謝靈運鬚美臨刑施爲南海祇洹寺摩詰像鬚中宗朝安樂公主五日鬪百草欲廣其物令馳騎取之又恐爲他人所得因翦棄其餘見劉公嘉話元遺山詩虛名不值一錢輕喚得呶呶百謗生可惜客兒頭上

髮也隨春草鬪輸贏以鬚爲髮不知何據  
楊廉夫西湖竹枝詞一卷所載多名士中有馬琬一  
章云湖頭女兒二十多青山兩點明秋波自從湖上  
送郎去至今不唱江南歌頗見婉麗馬字文璧秦淮  
人自少有志節詩工古歌行尤工諸畫亦金陵詞人  
之一也惜他作不多得耳

唐末侍御史黃子稜自洛陽寓居建陽之東觀山築  
亭以望其父之墓曰望考亭因以名里朱文公之父  
韋齋先生愛建陽山水未及小居公築考亭以承先

志正取黃侍御之意後人專以考亭屬文公侍御之名湮矣人過小橋頻指點全家都在畫圖中侍御詩中句也查初白和朱竹垞建陽詩云考亭本是黃家墓侍御橋邊宅久空陳蹟已銷名姓外好詩猶展畫圖中後來結搆原因此佳處溪山遂屬公欲買麻沙村畔屋餘年拚作蠹書蟲

楊妹子宋詩紀事謂恭聖皇后之妹元吳氏道仙山秋月圖詩自注則云宮扇馬遠畫宋甯宗皇后楊氏題詩自稱楊妹子書史會要謂楊妹子書法極似甯

宗馬遠畫多其所題語關情思人或譏之折衷諸說  
當以記事爲正項鼎鉉呼桓日記云馬遠畫梅四幅  
俱楊妹子題後有楊娃之章一小方印其白玉蝶梅  
云重重疊疊染緗黃此際春光已半芳開處不禁風  
日暖亂飄晴雪點衣裳著雪紅梅云銖衣翠蓋映紅  
顏未委何年入帝闈默被畫工傳寫得至今猶似在  
衡山烟鎖紅梅云天桃豔杏豈相同紅潤姿容冷淡  
中披拂輕烟何所似動人春色碧紗籠紅萼玉蝶梅  
云渾如冷蝶宿花房擁抱檀心憶舊香開到寒梢尤

可愛此般必是漢宮粧宋氏舞尊小宛堂詩云小宛  
堂前梅兩枝疎花點點映清池分明馬遠圖中見只  
少楊家妹子詩

列朝詩集載袁敬所題淵明五柳圖詩云藜杖芒屨  
白布裘山中甲子自春秋呼兒檢點門前柳莫遣飛  
花過石頭相傳敬所爲靖難後流寓常山之松嶺酒  
酣書此擲筆悲吟有江右布商見之曰此吾鄉某編  
修也何爲在此敬所趨掩其口不顧而去今按元貢  
師泰詩與此同或敬所書貢詩而人遂誤爲其作

狀元黃由妻平江胡氏給事公女也號惠齋有文章  
兼通書畫吳人傳其戲因几案上凝塵畫梅一枝于  
中乃題百字令云小齋幽僻久無人到此滿地狼籍  
几案塵生多少憾把玉指親傳踪跡畫出南枝正開  
側面花蕡俱端的可憐風韻故人難寄消息非共雪  
月交光這般造化豈費東君力只欠清香來按鼻亦  
有天然標格不上寒窗不隨流水應不鉢宮額不愁  
三弄只愁羅袖輕拂子由帥蜀夫人偕行過黃州雪  
堂行書赤壁賦于壁劉改之題沁園春一闋於後云

按轡徐驅兒童聚觀神仙畫圖正芹塘雨潤泥香路  
輶金蓮自墺小小藍輿傍柳題詩穿花覓句艷蓋扳  
條得自如經行處有蒼松夾道不用傳呼清泉怪石  
盤紆信風景江淮各異殊想東坡賦就紗籠素壁西  
山句好簾捲晴珠白玉堂深黃金印大無此文君載  
後車揮毫處看淋漓雪壁真草行書又有草書禊序  
雖未合法大書橫幅亦嬾人所難也

華州王允甯維楨生平以少陵爲宗尤自詡七律然  
極懦鈍胡元瑞云嘉靖時爲杜者王允甯孫仲可爲

六朝者黃勉之張愈光允甯於文矯健勉之於學沈  
雄皆勝其詩錢受之云允甯論詩服膺少陵自謂獨  
得神解尤深于七言近體以爲有照應開合關鍵頓  
挫其意主興主比其法有正插倒插而善用頓挫倒  
插之法者宋元以來推李崆峒一人及其自運則巒  
笨棘澁澁穢滿紙如潦倒措大經書講義填塞滿腹  
拈題駁義十指便如懸椎累人捧腹良可一笑也愚  
按五言有句無篇如千里秋江水孤舟月夜吟花樹  
迷官路濤聲入縣門山無雲斷處塔有雁來時暮雲

迷遠岫春棹響空江天險分秦塞神謀度漢兵尙凜然可誦也朱氏彝尊說

張文忠居正以奪情爲清議所不容然能身任天下之重定陵沖年請大閱京營時掌中樞者山陰吳兌也曾繪圖以傳及戚武毅鎮虜大臣行邊簡閱士馬隨上功狀疏恩晉秩鋒火不徹于甘泉者十五年江陵之秉國成可謂安不忘危得制治保邦之要矣于文定與邱尚書書云江陵以蓋世之功自豪固不甘爲汚鄙而以傳世之業期其子又不使濫有交遊其

平生顯爲名高而陰爲厚實以法繩天下而間結以恩其深交密戚則有賂路人不敢也儻帥鉅卿則有賂小吏不敢也當其柄政舉朝爭誦其功及其旣敗舉朝爭索其罪皆非情實矣嘗有題詩于故宅云恩怨盡時方論定封疆危日見才難足稱詩史亦朱氏

靜志居詩話

漁洋詩話明末七言律詩有兩派一爲陳大樽一爲程松圓大樽遠宗右丞東川近學大復松圓學劉文房韓君平又時時染指放翁此其大畧也程警句如

爪步江空微有樹秣陵天遠不宜秋梅殘竹燼西窗  
雨雪沴香濃小閣雲古寺正如昏壁畫層湖都作水  
田衣夢裏楚江昏似墨畫中湖雨白於絲遠雁如塵  
飛水面亂飄疑葉下吳頭迴峯凍雨皆成雪出霧危  
巒半是雲多年華髮絲相似三月春愁水不如澗飲  
斷虹明積翠湖飛片雨亂斜陽羽聲變後寒風急虹  
影消來白日過城上雪聲遊子屐縣南風色酒人家  
嶽寺夜眠春澗雨浦樓寒醉雪山風皆不愧古作者  
香祖筆記梅村詩話云嘗與陳卧子共宿問其七言

律詩何句最爲得意臥子自舉禁苑起山名萬壽複  
宮新戲號千秋一聯然余觀其七言殊不止此如九  
龍移帳春無草萬馬窺邊夜有霜左徒舊宅猶蘭圃  
中散荒園尙竹林禹陵風雨思王會越國山川出霸  
才石顯上賓居柳市竇嬰別業在藍田七月星河人  
出塞一城砧杵客登樓四塞山河歸漢闕二陵風雨  
送秦師諸聯沈雄偉麗近代作者未見其匹一時瑜  
亮獨有梅村耳

江南李後主嘗於黃羅扇上書以賜宮人慶奴云風

卷之二  
三  
情漸老見春羞到處消魂感舊遊多謝長條似相識  
強垂烟態拂人頭其扇在宋時猶傳諸貴人家見春  
羞三字新而警

才約使契丹詩云押燕移離畢看房賀跋支醕行三  
匹製蜜賜十貔貅移離畢官名如中國執政官賀跋  
支如執房閣匹製小木嬰以色稜木爲之如黃漆貔  
貅如鼠而大契丹以爲珍膳見霏屑錄

唐張謂詩家無阿堵物門有甯馨兒以甯爲去聲劉  
夢得贈日本僧詩云爲問中華學道者幾人雄猛得

甯馨以甯爲平聲蓋王衍傳云何物老嫗生甯馨兒  
山濤叱衍語也又南史宋王太后疾篤使呼廢帝帝  
曰病人間多鬼那可往太后怒謂侍者將刀來割我  
腹那得生甯馨兒據二說知晉宋間以甯馨兒爲不  
佳也雖平去二音皆可讀然張劉詩義則乖矣東坡  
平山堂詩云六朝文物餘邱隴空使奸雄笑甯馨作  
仄聲讀已上皆吳虎臣漫錄葉氏大慶云按通鑑注云甯字晉  
書無音世以甯音之甯馨猶言阿堵指物之稱斯言  
是也阿堵物猶言這箇物甯馨兒猶云如此兒平去

聲皆通而美惡亦皆可用晉書云王衍神情明秀風姿詳雅總角嘗造山濤濤嗟歎良久旣去目而送之曰何物老嫗生甯馨兒然誤天下蒼生未必非此人也此乃先褒後貶之辭故以然字爲間隔漫錄謂濤此衍語非也至王太后云云乃怒罵之辭爾又馬大年賴  
真子古所謂阿堵者今所謂兀底也所謂甯馨者猶錄云言恁地也又按世說殷浩見佛經云理亦應阿堵上又桓溫大陳兵衛謝安曰諸侯有道守在四鄰明公何須壁間著阿堵輩又殷浩嘗至劉惔所清談殷去

後乃云田舍兒強學人作爾馨語王丞相云見謝仁祖常令人得上與何次道語惟舉手指地曰正自爾馨桓溫詣劉真長臥不起桓彎彈彈劉枕劉作色曰使君如馨地甯可鬪戰求勝王仲祖好儀形每攬鏡自照曰王文開那生如馨兒此所謂阿堵與爾馨如馨正合兀底恁地之解江西詩派李商老詩短李門前無甯馨書淫詩癖類天成意蓋本于張謂山谷詩語言少味無阿堵冰雪相看有此君陳簡齋曰疾詩天公嗔我眼常白故作雲花阿堵中如此用事深于

詩者必知之

梁元帝金樓子舉宋王太后語直作那得生如此兒義更明顯

雪浪齋日記云聯句自退之斬新開闢苕溪漁隱曰謝宣城集有聯句七篇陶靖節有聯句一篇杜工部集有聯句一篇則諸公已先爲之謂退之開闢非也愚按漁隱之言亦未爲得聯句實自漢柏梁臺始又何遜李白顏真卿皆有是作不特陶謝杜諸公也

前輩詩文多用化鶴事其事卻有二神仙傳蘇仙公者桂陽人漢文帝時得道有白鶴數十降于門乃跪白母曰某當仙被召有期卽拜辭昇雲漢而去後白

鶴來止郡城東北樓上人或挾彈彈之鶴以爪攫樓板似漆書云城郭是人民非三百甲子一來歸吾是蘇君彈何爲此一事也蘇君名耽又續搜神記遼東城門

華表柱忽有白鶴來集人欲射之于空中歌曰有鳥有鳥丁令威去家千歲今來歸城郭猶是人民非此復是一事山谷戲書秦少游壁云化作遼東白鶴歸朱顏未改故人非此用令威事次韻宋楙觀東坡出遊云人間化鶴三千歲海上看羊十九年此用蘇耽事化鶴看羊皆的切蘇氏

李莊簡公光風槩凜然而詩筆清婉有致最愛其越  
州雙雁道中一絕云晚潮落盡水涓涓柳老秧齊過  
禁烟十里人家雞犬靜竹扉斜掩護蠶眠

覺非盦筆記卷六 終